

REPUBLIKA Y'UBURUNDI



IBIRO VY'UMUKURU W'IGIHUGU

IJAMBO RYA NYENICUBAHIRO

PETERO NKURUNZIZA UMUKURU W'IGIHUGU, INYUMA

Y'UMWAKA UBURUNDI RURONGOWE N'INZEZO ZAVUYE

MU MATORA

MUKAMBESI, GENEKE REZO RYA 25 MAYANGA GENERO 2011

**Barundi, Barundikazi,
Ncuti z'Uburundi,**

1. Dutanguye gushimira Imana Mushoboravyose yo idushikanye kuri uyu musi turamutse duhimbaza umwaka tumaze igihugu cacu gisubiye kurongorwa n'indongozi nshasha abenegihugu bo nyene bitoreye.
2. Kukaba nkako, muravyibuka, hari kw'igenekerezo rya mirongo ibiri na gatandatu Myandagaro umwaka w'2010, aho twashikira amabanga ahambaye yo kurongora Uburundi, inyuma y'amatora abarundi bitavye ari benshi, yabaye ku mugaragaro, mu mwidegemvyo no mu mutekano, baba abarundi bari mu migambwe n'abatari muri yo, baba abari mu mashirahamwe adaharanira inyungu za politike canke amadini, baba abaserukira amashirahamwe mpuzamakungu canke abamenyeshamakuru, bose barayakwirikiranye kuva agitegurwa gushika arangire, batako baremeza ko yagenze neza.
3. Uno musi rero uri hejuru, twashaka turabire hamwe, mu majambo make, ivyaranze uyu mwaka, ingene twaranguye ivyo twari twiyemeje, ivyagoranye, mu yandi majambo ingene igihugu cacu cifashe.

**Barundi, Barundikazi,
Ncuti z'Uburundi,**

4. Twagira tubanze gukeza abarundi ku ntambwe tugezeko mu kugendera intwaro ya demokarasi.
 Nkako, naho hari abikuye mu matora kandi ni uburenganzira bwabo, abarundi benshi ntimwabatije umurindi, mwagumye ku murongo, muritaba amatora kugera ahene, muragira indahiro gucira ikivi hagati. Mwibaze iyo amatora ataba akajagari kaba kari mu gihugu, igihugu kitagira abakirongora bemewe n'abanyagihugu kandi bashizweho hisunzwe amategeko. Tuba twasubiye muri za ntwaro z'ivyaduka, zimwe z'imfatakibanza, mu marira n'amaganya.
 Turabakeje rero bivuye ku mutima kuba mwarankiye abashaka kudusubiza muri iyo nzira idashika.

5. Turabakeje kandi kuri uyu mwaka urangiye amatora y'Umukuru w'igihugu arangiye. Naho ba sesankuyoze, ba “ **tura tugabure**“ bari bashatse kubaburagiza, mwarabankiye murahagararira intsinzi ya demokarasi mwaharaniye mugashikira bitoroshe. Umwaka urarangiye rero inzego zatowe zikora, kandi zisubiriye izahahora, nazo nyene zamaze mu mahoro ikiringo zari zaratorewe. Ni iteka ku gihugu cacu.
6. Twagira natwe dusubire kubemerera ko tuzokora ibishoboka vyose kugira iyo ntamwe demokarasi yacu igezeko ntisubire inyuma. Nta ngendo n'imwe tuzokwigera twemera ngo ize kuvuguruza abanyagihugu; iryo mwapfunditse mu matora tuzoguma turisonera tudahigimanga.

**Barundi, Barundikazi,
Ncuti z'Uburundi,**

7. Uyu mwaka tumaze igihugu kirongowe n'inzego zavuye mu matora, waranzwe n'ivyiza bitari bike. Reka duce ku masonga bike bike.
8. Twaragendewe n'indongozi z'ibihugu bibanyi n'ibihugu bigenzi nk'Urwanda, Somaliya, Zambiya na Afrika y'epfo.
9. Twarakiriye aha iwacu amanama mpuzamakungu. Aha twovuga nk'inama yahuje abasenyeri ba katorika bo mu karere k'ibiyaga binini, iyahuje abarongoye ishengero Eglise Méthodiste Libre kw'isi yose, inama yahuje abarongoye amashengero ya Anglicane yo mu Rwanda no mu Burundi, abarongoye amashirahamwe nyafrika y'abashingwamanza, abarongoye inzego nyaafrika zo kurwanya igiturire n'amabi asa na co, n'ayandi.
10. Twarakiriye kandi inkino n'amahiganwa ahuza ibihugu vyinshi nko mu nkino z'umupira w'amaguru n'umupira w'amaboko ku rwego rwa Afrika (CAF) n'inkino zihuza abasirikare bo mu karere ka Afrika y'ubuseruko. Ibi vyose ni ikimenyetso ko amakungu yizigiye Uburundi, igihugu gitunganijwe neza kandi nyabagendwa. Ni ivyo kwishimira no kuzigama.

11. Ikindi ciza caranze uyu mwaka ni icizere amakungu yashize ku Burundi aho ubu ari twebwe turongoye inama nkuru y'umutekano mw'ishirahamwe ry'ubumwe bwa afrika, tukaba turongoye kandi ishirahamwe ry'ibihugu via Afrika y'ubuseruko.

Tuboneyeho akaryo ko gusubira kwibutsa abarundi inyungu zimwe zimwe tumaze canke twimirije kuronka kubera iyinjira ry'Uburundi mw'ishirahamwe ry'ibihugu vyo muri Afrika y'ubuseruko. Nazo ni nk'izi:

Ubwa mbere: Ivyobihugu ntibirabu nk'ababanyi gusa canke abazimyamuriro, ahubwo ubu turabwa nk'abavukanyi, abavandimwe dusangiyi uburaro n'uburamuko.

Ubwa kabiri: Abarundi baca bashobora kurangura canke gushora ibidandazwa bimwe bimwe mu bihugu bigize iryo shirahamwe batarishe amatagisi ya duwane n'uruhusha rwo kwinjira (Visa d'entrée).

Ubwa gatatu: Hari ibikorwa vyinshi Uburundi butokwishoboje ubu biriko birarangurwa canke vyimirije kuja mu ngiro kubera ukwo gukorera hamwe. Ehe raba namwe ibarabara rihuza Urwanda, Uburundi na Tanzaniya riciye ku Ruhwa n'i Mugina ririko rirubakwa; Uburundi n'Urwanda bigiye kurahura vuba umuyagankuba ku bindi bihugu vyo mw'ishirahamwe ry'ibihugu vyo muri Afrika y'ubuseruko ku ntererano y'ibanki ya Afrika y'iterambere; hagiye kwubakwa ibarabara ry'indarayi riva Isaka rigaca Keza rikaja i Musongati; hagiye kwubakwa umuringoti wo kuzana ibitoro uzova i Kampala ugaca i Kigali uza i Bujumbura.

Hari kandi akunguko kagiye kuboneka ku bisagara via Kayanza, Muyinga na Ngozi, aho bigiye kuronwa amazi meza akwiye.

Ku kiyaga Tanganyika naho, hariko haraba ivyigwa vyo kunagura ingene gikoreshwu mu rudandaza, mu gutwara abantu n'ibantu, hamwe no gukomeza ibivuko.

Naho tutobidondagura ngo tubimare, reka twibutse ko mu vyiza turiko turaronka harimwo kuronka imihora itomoye muri bwa buhinga bwa none bwo guhanahana amakuru. Ni akarusho kadasanzwe abarundi tuzokwinovora.

12. Uyu mwaka kandi waranzwe n'ugukomeza ingendo yo guha ijambo abarundi, guhanuza imice inyuranye igize ubuzima bw'igihugu. Ibi vyadushikanye ku kuronka intumbero ya politike y'igihugu mu vyo gukomeza intwarz ibereye no kurwanya igiturire n'amabi agikomokako, mu kuronka ihangiro ry'ingene Uburundi buzoba bumeze mu mwaka w'2025; mu gutunganya umugambi wa kabiri wo kurwanya ubukene CSLP II, mu kuronka ibwirizwa rigenga imigambwe, mu kuronka ibwirizwa rigenga amatongo, mu gushiraho umurwi wigenga ujejwe agateka ka zina muntu, mu gushinga urwego rw'umuha na Leta, mu gutunganya inama ya bose y'abegwa n'ivyo kumenyesha amakuru n'inama ya bose ihuza abarongoye amashirahamwe adaharanira inyungu za politike, n'ibindi.
- Iyi ngendo ni yo iriko irabandanya mu mugambi wo gushiraho inzego z'ubutungane bwo mu bihugu bivuye mu ntambara, umugambi wo gutorera inyishu ikibazo c'irwirirana ry'abantu n'ingaruka bijanye, umugambi wo gutunganya gushasha politike yo kwivuna abansi, umugambi wo guhamagarira abarundi guhinduka, n'ibindi.
- Nkuko twavyiyemeje, ni ingendo tuzogumana, gurtyo igihugu kirongorwe hisunzwe iviyumviro bivuye muri beneco, bahurikiye mu mice itandukanye y'ubuzima bw'igihugu atabakumiriwe, kandi atabasubiriye abandi.
14. Turateye akamo kandi abanyapolitike bamwe bamwe basa n'abasaba ivyo badashaka ngo bikubite agashi, "**bakubite i Bweru bagarure ubwenge**". Nkako, basaba ibiganiro ariko batumiwe ntibemere kuja hamwe n'abandi banyepolitike canke abandi barundi benewabo.
- Turasubiye kubakurira inkoni ku gishitsi, nta biganiro tuzogirana n'akagwi dukumiriye abandi, kandi ntiteziga tugwa mu mutego wo gutuma abanyepolitike bibaza ko baruta abandi barundi, canke ko aribo bafise inyishu zirashe ku bibazo vy'igihugu cose.
- Nayo ibiganiro vyotuma tuvuguruza ico abanyagihugu bashinze mu matora, nibarindire, amaso azohera mu nzira. Vyongeye ntihagire abahendwa, amase ya kera ntagihoma urutaro, ni bazeruke maze bitegurire nyabuna amatora yimirije yo mu 2015, kandi igihe ni iki.

**Barundi, Barundikazi,
Ncuti z'Uburundi,**

15. Uwu mwaka waranzwe kandi no gushira mu ngiro ivyo twashikirije mw'ijambo ryacu ryo ku wa 26/8/2010, aho twashikira amabanga twari duhejeje gutorerwa n'abanyagihugu yo kurongora igihugu. Ico gihe ni ho twatangaje ko ata kwihanganira na gato abarya ibiturire n'abasesagura amatungo y'igihugu, twongera dutanguza ingendo nshasha yo guhimiriza indongozi aho iri hose kumenya ko itegerezwa gutanga raporo ku banyagihugu no kubayikurira mu nzego.
16. Muri iyo ntumbero twarasavye abashikiranji kugira ingendo yo kuganira n'abo barongoye kugira ngo bungurane ivyiyumviro, batange inyishu ku bibazo abo bakoresha bafise ariko batababeshe ngo bemere ubuki bategeka. Turashima cane ko benshi babikoze, tukizera ko biri mu vyatumye uyu mwaka utarangwamwo amayegereyegere ku rugero twahora tuyabonako. Turasavye ngo babandanye iyo ngendo, tugabisha indongozi aho iri hose ko ni abo irongoye babura ikiyago bigatuma bagira yegereyegere izobihanirwa bikwiye. Turashimiye n'abakozi kuko bahinduye ingendo bakabona ko kuja muri yegereyegere atariwo muti.
17. Tuboneyeho gusubira gukebura amashirahamwe amwe amwe yitwa kw'adaharanira inyungu za politike, ngo ahebe akageso ko kurenga ku vyo azi, agahamagarira abanyagihugu kugira imigumuko, iyo hari akagorane kakiriko kararondererwa inyishu irama na Leta. Tuyasavye kubanza kwiyumvira ingaruka mbi zishobora guterwa n'inyifato nk'iyo cane cane n'uruhara yoba abifisemwo. Turasavye abanyagihugu kwiyamiriza ahubwo mwene izo nyosha mbi nakare ngo "**inyosha mbi ingana umurozi**". Inzego nshingwantwaro, inzego z'umutekano n'iz'ubutungane nizihakanurire, zikore ico zirekurirwa n'amategeko, zihagararire igihugu n'abanyagihugu. Ahacu, turamenyesheje ko uwuzorukarisha ruzomumwa. Vyongeye ugomba akaguma n'intambara, bizohera mu rugo iwe biherere iwe nyene. Amarira n'amaganya, kubura ivyacu n'abacu, kwamana intekera ku mutwe mu guhunga kwa misi yose; ugutotezwa twaciymwo n'ubu tugifise ibikomere ku mutima, uwo bitaciye ngira ni we atazi ingaruka mbi y'akaguma n'akajagari mu gihugu. Iyo nyifato n'iyo ngendo bigayitse ntigasubire kuboneka no kuba muri beneburundi.

Turabisubiyemwo, uwuvyipfuje arabikorera iwe mu rugo kandi biherere iwe nyene.

18. Ku vyo kurwanya igiturire n'isesagurwa ry'ubutunzi bw'igihugu, ibikorwa ni vyinshi. Uretse ko poliltike yo gushira mu ngiro uwo mugambi yamaze guharirirwako n'ibisata binyuranye vy'ubuzima bw'igihugu, ubu ikaba yaraciye mu nama nshikiranganji, tukaba turiko turayitosora utunenge tumwe tumwe, uburorero dufise buvuye mu buzi bumwe bumwe buragaragaraza ko hari icahindutse. Nko mu gisata OBR co gutoza amakori n'amatagisi ya Leta, kuva mu kwezi kwa mbere gushika mu mpera z'ukwezi kwa gatandatu uno mwaka carinjije mu kigega ca Leta amafaranga angana na miliyaridi 240, ariko mu kiringo nk'ico nyene c'umwaka uheze hari hinjiye amafaranga angana na miliyaridi 177, ni ukuvuga ko hiyongereyeko ibice 39%.

Murumva ko muri ico gisata, baba abakozi, baba abatanga ayo matagisi n'amakori, bose bagenda bongerereza gukora neza, bongereza gukwirikiza amategeko y'ukudandaza, kuko biragaragara ko kwinjiza ibidandazwa vya magendo vyari vyarasasiwe indava, arico gituma bamwe bidogera OBR ngo ibaca amakori y'umurengera naho ari uko atayo bari bamenyereye gutanga. Abahora muri iyo ngendo mbi bakaba bariko baramenyekana bongera bahanwa.

19. Muri iyi ngendo nyene, uyu mwaka ni ho habaye gukwiragiza mu gihugu abigisha n'abakozi bo mu gisata c'amagara y'abantu, kuko vyaragaragara ko hamwe baba bakenye ahandi naho barengako bakora amasaha adakwiye, ariko bagahembwa kumwe. Ni intambwe ikomeye. Turateye akamo abavuzi bo mu gisagara ca Bujumbura bafatwa n'iyi ngingo nabo nyene ngo banyarutse kuyikwirikiza, tugasaba ko no mu bindi bisata vyogenda uko, kuko aho naho Leta yahahombera uburyo bwinshi.
20. Mu gisata kijejwe amatongo, amatongo ya leta atari make yari yarihagiwe n'abantu yarasubijwe mu ntara za Bubanza, Bujumbura, Muvinga, izindi ngingo zo kwaka abihagiye amatongo ya Leta ziriko zirigwa mu Bushikiranganji bw'ubutungane.

21. Intumbero twashikirije kandi ko abategetsi bose bajejwe amabanga bazokwerekana ivyo biyemeje kurangura ku mwaka ku mwaka, kandi uko amezi 6 aheze batange raporo ku mugaragaro yaho bagejeje, bashimirwe canke basezererwe, iriko irakurikizwa.
22. Abategetsi batari bake baramaze gushikiriza ivyo baranguye ku mbonesha kure no ku maradiyo. Ariko muri rusangi, barakoze neza, na cane cane ko wabaye umwimenyerezo mushasha, muri iyi ngendo nshasha yo guhinduka no guhindura ingendo, aho dusabwa gukora kandi tugashitsa ivyo tuba twiyemeje. Ni ihinduka rikomeye cane risaba gukunda igihugu no gukunda akazi karanguwe neza.
23. Ikiponeka ariko ni uko duhakwa kwiyemeza vyinshi dufatiye ko ibikenewe ari vyinshi ariko uburyo bwo kubishitsa bukaba buke, kuko vyinshi bisaba amafaranga menshi n'integuro zimara umwanya.

**Barundi, Barundikazi,
Ncuti z'Uburundi,**

24. Ibibazo dutegerezwa kuguma duhanganye navyo ni vyinshi kandi duhamagarira abanyagihugu kudushigikira kugira babone akarusho. Navyo ni nk'ibi bikurikira.
25. Hariho ikibazo co kurwiza akazi kugira ngo ubushomeri bugabanuke mu gihugu. Iki ni ikibazo kitisangijwe n'uburundi gusa kuko no mubihugu bitunze kirahari. Ahacu, mu kurindira ko ivyigwa vyo gushinga politike y'igihugu yo kurwiza akazi birangira, twarabaye turatarira ico kibazo. Muti gute?

Ubwa mbere: Twaratanguye umugambi wo gutunganya inyigisho mu mashure mato mato kugira ngo aherere mu mwaka w'icenda, gurtyo abana baheze ico gice bafise ubumenyi bubashoboza kwitunga mu buzima.

Ubwa kabiri: Turiko turasubiramwo itunganywa ry'inyigisho kugira duhe ikibanza kinini izijanye n'imyuga n'ubuhinga haba mu mashure mato mato, mu yisumbuye na za kaminuza. Ivyo bizotuma umuntu arangiza amashure ashobora guca aronka ibikorwa akaba ashobora no gutanga akazi.

Ubwa gatatu: Twarashinze icigwa c'intunganyamigambi(Entrepreneuriat), ubu kikaba kiriko kiratangwa mu bisata vyose via za Kaminuza.

Ico cigwa kigafasha abarangiza amashure gushobora kwitunganiriza umugambi wa kazoza utajanye no gusaba akazi Leta, ingendo yamugaje benshi. Twipfuza ko ico cigwa cohabwa n'abanyeshure baheza amashure yisumbuye, kigatunganywa no ku bakozi ba Leta.

Ubwa kane: Inyigisho ziriko ziratunganywa gushasha kugira ngo zisunge ivyo igihugu gikeneye no ku rugero kibikeneyeko, ntihagire abahereza amashure kuja mw'ibarabara.

Ubwa gatanu: Turiko turahinyanyura inyigisho kugira zigire isano n'izitangwa mu bihugu via Afrika y'ubuseruko, gurtyo abazoba bahejeje amashure aha iwacu, bashobore kuja kurondera akazi muri ivyo bihugu dusangiyi ishirahamwe.

Ubwa gatandatu: Leta iriko irakora ibishoboka vyose kugira yorohereze abarwizatunga kuzana no gushinga imitahe aha iwacu, gurtyo haboneke akazi kenshi, nakare ntitwokwibaza ko akazi kava muri Leta gusa.

Ubw'indwi: Twaratanguje umugambi wo kuba mu bigwati. Uretse ko uzotuma abanyagihugu baba heza, uzotuma haboneka n'ubuzi butandukanye, cane cane ku banyamyuga nk'abubatsi, ababajji, abakora amazi, abakora amatara, abateranya ivyuma, abamwa imishatsi, n'ibindi.

Ubw'umunani: Twama turiko turahimiriza abanyagihugu gukora ibikorwa rusangi. Iyo hubatswe ishure canke ivuriro, uretse ko haboneka akazi kuri ba banyamyuga, haca hakenerwa abigisha n'abavuzi bahakora.

Turasavye rero ngo abantu bitabire cane ivyo bikorwa, cane cane abo bashomeri bahejeje amashure, kuko bazoba bariko baritegurira kazoza. Ntihogire abigira abavugizi babo baciye ku maradiyo ariko barwanya ibikorwa rusangi.

Reka rero dukomeze ibi vyose turiko turakora kandi vyiza, maze ubushikiranganji bubijejwe bonyarutse iyo nteguro ya politike y'akazi, ariko twibutsa abarundi ko nako kazi katazodukwira igehe tutogabanya urugero turondokako ubu.

Barundi, Barundikazi, Ncuti z'Uburundi,

26. Ntitworangiza iri jambo tutavuze ku kibazo c'umutekano. Nkuko twama twabivuze, umutekano ni igikorwa ca misi yose. Hari hacie igehe havugwa ikibazo c'uguhungabana kw'umutekano mu ntara ya Bujumbura. Twarihaye ikiringo c'amezi abiri co kugendera iyo ntara. Kubera abanyagihugu, amakomite y'umutekano, abajejwe intwaro n'abajejwe umutekano no ku nsiguro abarongoye igihugu bagiye baratanga mu manama bagiye bararemesha, abagizi ba nabi batari bake barafashwe n'ibirwanisho vyabo, bashikirizwa ubutungane ngo bubacire imanza, baheze baronke ibihano bibakwiye hakwirikijwe amategeko. Abensi mu bari barahenzwe barishikanye basubira mu vyabo, abandi bagwa mu bubisha baba bariko barakora, none ubu abanyagihugu bo muri iyo ntara bari mw'isekeza ryo kwiteza imbere, umwanya bataye bawurihe kwiruka. Natwe twabahaye ica gatatu (1/3) c'ibikoresho vyose twaterera mu bikorwa vy'iterambere rusangi mu gihugu cose, kugira ngo mu kiringo c'imyaka itatu iri imbere, iyo ntara izobe igeze ku rugero rw'izindi ntara mw'iterambere.
27. Iyo ntara yatubereye ikimenyetso n'ishimikiro ryo kubandanya tuvuga kandi turemesha abanyagihugu tuti: "**Nta ntambara izosubira kuba mu Burundi**". Nkako, nta mvo ya politike woronka ubu iwacu kandi inzego zirongoye igihugu zavuye mu matora, zigakorera ku mugaragaro, zigaha ijambo abanyagihugu bo mu bisata bitandukanye vy'ubuzima bw'igihugu kugira baterere iviyiyumviro ku nyishu zotorerwa ibibazo bihanze igihugu. Nta banyagihugu canke inzego z'igihugu boha nirwere intambara, naburya twese twaruhijwe n'amakuba yabaye mu ntambara zaheze. Reme rero, uwuzoyiyumvira izoherera mu mutwe iwe.

Vyongeye, bitebe bitebuke, uwuriko akora ububisha wese ahari hose, intahe izomokubita mu gahanga, nakare twimirije gushiraho inzego zijanye n'ubutungane bw'ibihugu bivuye mu ntambara.

28. Guhungabana kw'umutekano biza birashika hirya no hino, ubusuma n'ubwicanyi biza biribonekeza, ivyo ntibisigura ingwano. Uwubikora ntaze yiyite umurwanyi, arahabwa izina ry'icoakoze kandi akwirikiranwe kuri co, maze ubutungane bumuhashe nkuko amategeko abitegekanya.

Turagabishije abacamanza bamwe bamwe biharaje kuvuga ngo Umukuru w'ighugu ni we adutumye ibi na biriya. Umwe wese nakore ico arekuriwe n'amategeko, abavuga bene ivyo bahanwe kuko ni ababeshi.

Ni co gituma dusubiye gutera akamo abanyagihugu ngo bagume bafatanye mu nda, babandanye gutuza ata kinya izo nkozi z'ibibi, bakomeze ya makomite y'umutekano ku mitumba, maze hakomezwe kwa gukorana hagati y'abanyagihugu, abajejwe intwaro, abajejwe umutekano n'abajejwe ubutungane.

Barundi, Barundikazi, Ncuti z'Uburundi,

29. Mu kurangiza, twashaka twibutse abanyagihugu ko bokwitabira ibikorwa vyo gusigurirwa ibijanye n'ishingwa ry'umurwi wo kumenya ukuri ku mabi yabaye, atari ukuzura akabozé, ariko ari ukugira dusubize hamwe, dutarire amahoro arama yo mushinge w'iterambere.

30. Turasavye kandi abarundi ngo babandanye bitegurira ihimbazwa rya Yubire y'imyaka mirongo itanu Uburundi buzoba bumaze bwikukiye mu mwaka uza nkuko twabibahamagariye, maze tuzonezerwe mu kwinjira, ukwezi kw'indwi kwose, ivyo tuzoba twakoze tuzokwitirira iyo myaka mirongo itanu, haba mu miryango, mu mitumba, mu mazone, mu mashirahamwe, mu makomine, mu ntara no ku rwego rw'ighugu.

31. Ahacu, turabemereye ko tugiye kubandanya dukora ibishoboka kugira umutekano usasagare, turwanye ubukene, maze abanyagihugu baronke akoyoko. Aha tukaba tuzoshira mu ngiro impanuro twahawe n'Inama Nkuru y'ighugu ijewe Umutekano, aho iheruka kwiga ibijanye n'amahoro n'umutekano, inyigisho zo gukunda igihugu, gukurikirana no gutora inzira yo kugabanura ibiciro, n'ibindi.

32. Twashaka kandi gukengurukira abarundi bose n'amakungu bitanze batiziganya kugira tube dushitse kuri iyi ntambwe. Tubasavye kubandanya badushigikira kugira ngo umwizeru w'amahoro dufise ubandanye kandi dushobore kurangura imigambi dutegekanya y'iterambere ry'igihugu mu ntwaro ya demokarasi.
33. Turangije dusubira kubipfuriza umusi mwiza wo kwibuka umwaka abarundi tumaze turongorwa n'inzego twitoreye, muwuhimbazé mu kanyamuneza n'akamwemwe kenshi, murushirizeho kuzishigikira no kuziyoboka mu gukomeza amahoro n'umutekano, no mu kurangura imigambi y'iterambere ry'igihugu n'imiryango.

Imana ibandanye ibamurikira mu migambi yanyu,

Murakoze.